

Cimh Rizdin Majhung

Seizgan, lumj benq ajsa he. Mwh gou seng roengzdaej, gizneix couh louz roengz coij rizdin daih' it. Seizneix, hawj gou dauq yawj ajsa, cimh baenz coij baenz coij rizdin haenx ba!

Roek Bi

Daxbuz naeuz: "Saehcingz swheij swheij gagguh." Gwn haexngaiz le, gou nyoengx daxbuz ok henz suijlungzdouz bae, gaemdawz vanjdawh, hag gij yiengh de, aeu sijgezcingh daej swiq gonq, caiq yungh raemxsaw cungswiq. "Swiq ndaej caen seug ha! Cinyi ha, mwngz caen ak!"

Roek bi, gou louz roengz le rizdin "gagguh".

Cib Bi

Seiq nienzgaep, gou camgya le doeg yawj saw doxdax. Doxdax gaxgonq, gou sim gig mbouj onj: "Meh, gou lau gou....." Daxmeh yawj gou, gangj aen gojgaeq ndeu: Canghdwknyaen loeklak ra daengz aenrongz duzyiuh, ndaw rongz miz song aen gyaeyiuh. Canghdwknyaen dawz gyaed daiq ma ranz, siengj lienh ok song duz yiuh gaeb nyaen. Yienghneix couh dawz song aen gyaed cuengq youq ndaw gyaedgaeq gaeqmeh ndaw ranz faeg haenx. Doeklaeng, miz duz yiuh iq ndeu mbouj fug gij mingh neix, bonghmbin hwnj gwnzmbwn bae, baenz duz yiuh ceiq ak ndeu; lingh duz yiuh iq mbouj gamj sawq mbin, doeklaeng bienqbaenz duz gaeq ndeu.

Ngoenz daihngaih, gou ndaej daengz gaujgienj, deng hwk dwk gaiqfwngz ok hanh lo, hoeng baez

siengj aen gojgaeq daxmeh gangj de, couh dingh roengz sim daej, gaem bit vaiqviet dap daez. Doeklaeng, gou aeundaed daegdaengj ciengj.

Cib bi, gou louz roengz le rizdin "gagsaeng".

Cib'it Bi

Gwnz diegnywj, mbawfaex nding loenq roengz-daej, gou damzdoeg "mbaw loenq mbouj dwg mbaw fouzcingz, vaq baenz namhcin engq hoh va", danqheiq gyoengqde youq mwh sengmingh ceiq doeklaeng baenzneix gyaunde. Gyanghwnz, ndau-ndeiq baeyouz youq mbawmuq ndaemndat veh ok diuz sienq vangungj ronghsag he. Yaepyet haenx, gou ganjgip mbaenj gij nyienhmuengh gyaunde swheij. Ndaw ngoenzciet, bauqva ronghsag gyaunde, yungh caenh sengmingh dinjded de ciuq rongh daengx aen gyanghaemh, baenz gij gyaunde ciengxlwenx geiq youq ndawsim gou!

Cib'it bi, gou louz roengz le rizdin "roxnyinh daengz gyaunde".

Cibngeih Bi

Daxgoeng daxbuz geq lo, yawj ndangdaej songde ngoenz beij ngoenz nyieg, gou nyaenx mbouj ndaej siengsim. Gyoengqde coz gyaq, hoeng sengmingh caiq coz daengz doeklaeng hix yaek geq bae. Caeklaiq, caeklaiq! Daxboh daxmeh caeuq doenghbaez ityiengh hauqgingq songde. Cungj miz ngoenz ndeu, daxboh daxmeh hix lumj daxgoeng daxbuz yienghneix geq bae, gou hix itdingh lumj



daxboh daxmeh hauqgingq daxgoeng daxbuz nei, ndeindei doiqdaih bohme. Daj mbat gou daej-daengz aen seiqgyaiq neix, bohme couh ndiep dwk gou, mbouj ienqhoij mbouj lau dwgrengz vih gou gyauok daengx ciuhvunz gyoengqde. Gyoengqde cigndaej gou yungh ciuhvunz gou bae hauqgingq.

Cibngeih bi, gou louz roengz rizdin "hauqgingq bouxlaux".

Dauq yawj baenz coij baenz coij rizdin youq laj daengngoengz ronghyabyab neix. Gou lwnh gou swheij: Doenghbaez, ciengxlwenx geiqmaenh; seizneix, haenqrengz baenaj; daengzcog, engqgya gyaunde!

(roek nienzgaep Yangz Cinyi)



Seiziq Caen Vaiqvued

上林县大丰镇皇周小学四(2)班 Couh Lingzyij/周凌羽

Seiziq, gou miz haujlai saeh vaiqvued.

Geiq ndaej miz ngoenz ndeu, gou youq mbwq lo, gou couh heuh daxbuz daiq gou bae youzlozcangz guhcaemz, daxbuz couh naeuz: "Ndei, ndei, ndei, gou couh daiq mwngz bae!" Gou angqdwk diuq hwnjdaej. Daxbuz couh bae dawz ngaenzbau, lij dajcang yaep ndeu le, cij okdaej daiq gou bae youzlozcangz.

Gou caeuq daxbuz daejdaengz youz-lozcangz le, gou gig vaiq buet haeuj ndaw bae, daxbuz riengz laeng swenj: "Menh di, siujsim laemx bw." Gou naeuz: "Rox lo!" Yawjraen baihdaw miz haujlai cungj doxgaiq lwgnyez maij guhcaemz haenx, angq dwk cienq laeng heuh daxbuz: "Daxbuz vaiq di!" Daxbuz riudwk han

naeuz: "Ndei ndei ndei, sikhaek daengz!"

Gizhaenx miz haujlai doxgaiq hab lwgnyez guhcaemz, miz aenbinengh, miz moegmax, miz ciyouzraemx, miz aencongzdanz, lij miz ci-doxbungq daengj.

Gou lienzmuengz diuq hwnj gwnz congzdanz bae, baez diuq couh danz hwnj sangsang bae, cungj gamjsouh de dwg gou ciuh vunz neix cungj lumz mbouj ndaej. Gou youq gwnz congz diuq hwnj diuq roengz, diuq ndaej daengx ndang cungj dwg hanh. Seiz cingq guhcaemz hwnjyinx, daxbuz cawx daej hab niuznaij he hawj gou ndoet, caen sangj ha!

Seiziq, vaiqvued lai lo

(lauxsae son'gyauq Vangz Geiyangh)

Bonjsaw Caeuq Mbawfaex

Boh ha, mwngz guhlawz couh vut gij mbawfaex gou coq youq gwnz gyaqsaw de roengz gwnz namh bae, baet bae lone?

Gou rox, mwngz itdingh yienghneix naeuz: Mbawfaex miz gijmaz ndei yawj ne?"

Hoeng, bonjsaw gwnz gyaqsaw duh mwngz, youh miz gijmaz ndei yawj ne? Cih saw deihaenyaen, gou youh yawj mbouj rox—— lij beij mbouj ndaej doenghij mbawfaex duh gou dwgyaeyz gyaunde ne, mwngz vihmaz caezcaez cingcingj coq gij saw neix youq gwnz gyaqsaw ne?

Langhnaeuz gou vut bonjsaw duh



mwngz roengz gwnz namh bae, baet bae, mwngz angqfaengz lwi? Boh ha.

(Daj 《Bonjsei Sim Lwgnyez》(Veiz Gizlinz raiz) senj okdaej, Lwgfwngz-meh/卢奋长 hoiz)

Caiq Luenz Di Ndeu

Gou cungj dwg yawj ronghndwen Cungj roxnyinh de mbouj luenz Haemhneix gou yaek bae coihbouj Bin hwnj laeuz sang Cuengq aen daiz ndeu Caiq gya aen lae raez ndeu Hawj daxboh youq gwnz dieg yawjyawj Ronghndwen gou nem hwnjbae de Dwg mbouj dwg Ngeng lo

(ngeih nienzgaep Dauz Lozcwnz)

